

## **DI BESSÔI COME SIMPRI, VADÌ PLUI DI SIMPRI!**

Se no si fos furlans di buine çocje, che al ven a jessi restîfs e mastins, e vignarès voie pardabon di butâ il mani daûr de manarie e bandonâ dal dut chê sperance di liberazion e di autonomie che nus fâs bati la lune di tant timp in ca. Parcè che vuê, si scuen ricognossi di no vê fat un pas indenant, ma di jessi juste a cessecûl infidantsi dai articui de Costituzion, des promessis dal guvier, dal jutori dai nestris rapresentants al parlament, de onestât de politiche di ducj i colôrs. Il guvier democratic che o scugnìn gjoldi, nol è stât bon, cun dutis lis sôs cjaris, di puartâ vie un sôl gregari ai comuniscj, ni di disvidrignî la semence cuze dai fassiscj, che anzit e torne a menâ tant ben che mai par ducj i strops. E cumò, par tignîsi in piis, al tache a fâ l'amôr cun dute la vecje gjarnazie di diestre: liberâi di scure e compàs, nazionaliscj usâts a scuindi lis lôr camoris sot la bandiere dai trê colôrs, voltegabanis di ogni sete, simpri prontos a siervî cualsei paron che al dei cefâ aes lôr gramulis.

E je verementri un spettacul edificant cheste leghe di Azion catoliche e anticlericalisim, cheste messedance di Toniolo e Mazzini, chest panadot di "Rerum Novarum" e di "Odi navali". A noaltris no nus impuarte, verementri, la moralitât di chescj curiôs morosets: nus impuarte nome il fat che il guvier, butantsi di chê bande, al è obleât a meti vie tal casselin ogni intenzion di riforme regjonâl, di autonomie e ancje di qualunche decentrament. Tant al è vêr che cualchidun al è daûr a studiâ une riforme burocratiche: ma la riforme burocratiche fate prime de riforme regjonâl, e scugnarès vignî riformade une altre volte, cuant che il gnûf ordenament al disgruparà i berdeis dal madrac roman. Si po zurâ che nol nassarà nuie di positîf: ma intant la intenzion di butâ intun cjanton il plui impuartant articul de Cjarte Costituzionâl, e je clare ancje pai vuarps. E alore al è dibant che i nestris papavaruts, intai lôr discors, a tornin simpri a bati il claut de Regjon: lôr a san che la plui part de int la domande, ma a san ancje che il guvier no la darà.

E alore il lôr lengaç nol è fregul onest. Noaltris o sin duncje simpri di bessôi a scombati cuintri di chei che a son contraris e lu disìn clâr, e cuintri di chei che a cirin di mostrâsi a favôr nome par dâle di intindi al solit dordel. Di bessôi come simpri, vadì plui di simpri. Di bessôi e persuadûts che dal guvier no si varà nuie ni domandant, ni resonant, ni preant; e che, se si vûl vê alc, la strade e je une sole: fâ pôre ai parons, gjavâur di man par fuarce ce che, par amôr, no molaran mai plui.

josef marchet - Patrie dal Friûl - Lui / Avost 1951